

KHUTBAH JUMAAT
“KITA KINI DI AMBANG RAMADHAN ”
(11 Mei 2018M / 25 Syaaban 1439H)

الْحَمْدُ لِلَّهِ الْقَائِلِ :

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَلَّكُمْ تَتَّقُونَ ﴿١٨٣﴾

أَشْهَدُ أَنْ لَا إِلَهَ إِلَّا اللَّهُ الْمَلِكُ الْحَقُّ الْمُبِينُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ
الْأَمِينُ، وَضَعَ الْمَعَالِمَ لِطَرِيقِ الْهُدَى. اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ سَيِّدَنَا
مُحَمَّدٍ وَعَلَى آلِهِ وَأَصْحَابِهِ أُولِي الْفَضْلِ الْعَظِيمِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ،
أَوْصِيكُمْ وَإِيَّايَ بِتَقْوَى اللَّهِ وَطَاعَتِهِ لَعَلَّكُمْ تُفْلِحُونَ.

Kaum Muslimin Yang Dirahmati Allah,

Marilah sama-sama kita meningkatkan ketakwaan kepada Allah *subhanahu wata'ala* dengan bersungguh-sungguh melaksanakan segala perintah-Nya dan meninggalkan segala larangan-Nya. Mudah-mudahan kita memperolehi keberkatan dan keredhaan serta perlindungan Allah *subhanahu wata'ala* di dunia dan di akhirat. Mimbar pada hari ini akan menyampaikan khutbah bertajuk: **“KITA KINI DI AMBANG RAMADHAN”**.

Kaum Muslimin Yang Dirahmati Allah,

Kita berada pada penghujung bulan Syaaban. Tidak lama lagi kita akan memasuki bulan Ramadhan 1439 Hijri. Semoga kita dipertemukan dengan bulan Ramadhan yang penuh dengan kebaikan, keberkatan dan kerahmatan dari Allah *subhanahu wata'ala*. Pada bulan yang mulia inilah orang yang beriman

berlumba-lumba untuk melipatgandakan amalan bagi mendapatkan ganjaran yang besar di sisi Allah *subhanahu wata'ala*. Hanya orang yang sentiasa mengharapkan rahmat dan berkat dari Allah *subhanahu wata'ala* akan mengambil kesempatan dalam bulan ini untuk memperbanyakkan segala bentuk amal ibadah demi mendapatkan anugerah yang dijanjikan oleh Allah *subhanahu wata'ala*. Setiap saat dalam bulan yang mulia ini dimanfaatkan untuk mendekatkan diri kepada Allah *subhanahu wata'ala* dan seterusnya untuk mendapatkan pahala dan keredhaan daripada Allah *subhanahu wata'ala*.

Kaum Muslimin Yang Dirahmati Allah,

Sebelum melanjutkan lagi perbincangan kita mengenai Ramadhan, mimbar ingin mengambil kesempatan dalam tempoh masa selepas pilihanraya umum tempoh hari. Sebagai sebuah Negara Demokrasi, Malaysia juga telah mengamalkan sistem Pilihanraya Umum yang memberikan mandat atau hak kepada rakyat untuk memilih dan menentukan pucuk pimpinan negara.

Penunaian hak rakyat dengan mengundi dalam pilihan raya adalah bertujuan untuk memberi mandat atau kuasa dan kesahihan kepada pihak yang akan memerintah negara. Dengan mandat tersebut, pihak yang telah dipilih oleh majoriti rakyat, adalah berkuasa penuh untuk menjalankan pemerintahan dan pentadbiran negara ini secara sah. Oleh yang demikian, seluruh lapisan rakyat diwajibkan mentaati pucuk pimpinan yang telah dipilih secara sah itu, selama mana ia selari dengan kehendak syarak dan yang ditentukan juga oleh undang-undang yang bertulis. Hal ini telah

ditegaskan oleh Allah *subhanahu wata'ala* melalui firmanNya dalam surah An-Nisa' ayat 59:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِيَ الْأَمْرِ مِنْكُمْ فَإِن تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِن كُنتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾

Maksudnya: *“Wahai orang yang beriman! Taatlah kamu kepada Allah, taatlah kamu kepada Rasul dan juga golongan pemerintah dari kalangan kamu. Andaikata kamu berselisih pendapat mengenai sesuatu perkara maka rujukkanlah perkara tersebut kepada hukum Allah dan Rasul, jika kamu benar-benar beriman kepada Allah dan Hari Akhirat. Itulah yang terbaik bagi kamu dan lebih elok pula kesudahannya”*

Tugas dan tanggungjawab pihak yang dipilih adalah untuk menjalankan pemerintahan secara adil dan saksama kepada segenap lapisan masyarakat. Prinsip dan asas keadilan dan kesaksamaan ini hendak dijadikan teras dan dasar setiap program pembangunan negara secara seimbang, membentuk rakyat yang berjiwa merdeka, menyuburkan budaya ilmu, memperkasakan ummah dan negara dengan bantuan dan sokongan segala teknologi moden, mengukuhkan budaya dan moral, menjaga hak-hak kaum minoriti dan golongan wanita, memulihara alam semulajadi serta membina kekuatan ummah, dan segala-galanya yang diputus dan dilakukan oleh kerajaan yang beramanah sedemikian.

Kita sebagai rakyat pula, berkewajipan untuk memastikan diri kita sentiasa patuh, tunduk, taat dan setia kepada pemimpin yang telah dipilih itu selama mana ia selaras dengan kehendak syarak. Inilah antara intipati ajaran Islam dalam soal kepemimpinan negara.

Kaum Muslimin Yang Dirahmati Allah,

Kelebihan bulan Ramadhan berbanding bulan-bulan yang lain kerana difardhukan padanya ibadah puasa. Allah *subhanahu wata'ala* Berfirman di dalam surah al-Baqarah, ayat 183:

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِن قَبْلِكُمْ لَعَلَّكُمْ تَتَّقُونَ ﴿١٨٣﴾

Maksudnya: *Wahai orang-orang yang beriman! Kamu diwajibkan berpuasa sebagaimana diwajibkan atas orang yang terdahulu daripada kamu, supaya kamu bertakwa.*

Imam Ahmad *rahimahullah* meriwayatkan sebuah hadis dari Abu Hurairah *radhiallahu anhu* yang bermaksud : “*Bahawa sesungguhnya Rasulullah sallallahu alaihi wasallam pernah bersabda ketika datang bulan Ramadhan: ((Sungguh telah datang kepadamu bulan yang penuh berkat, diwajibkan atas kamu untuk puasa, dalam bulan ini pintu syurga dibuka, pintu neraka ditutup, syaitan-syaitan dibelenggu. Dalam bulan ini ada suatu malam yang nilainya sama dengan seribu bulan, maka sesiapa diharamkan kebaikannya (tidak beramal baik di dalamnya), sungguh telah diharamkan (tidak mendapat kebaikan di bulan lain seperti di bulan ini))*”.

Kaum Muslimin Yang Dirahmati Allah,

Sebenarnya begitu banyak persediaan yang boleh kita lakukan menjelang Ramadhan. Antaranya ialah:

Pertama: Persediaan ilmu agama. Ramai orang yang berpuasa tanpa ilmu di dada, dikhuatiri ibadah yang diharapkan mendapat pahala sebaliknya tidak diterima oleh Allah *subhanahu wata'ala*. Kita mesti meluangkan masa menuntut ilmu agama, khususnya ilmu dan pengetahuan tentang amalan berpuasa. Antara perkara yang perlu diberi keutamaan berkaitan dengan ibadah puasa ialah rukun, syarat sah, perkara yang membatalkannya, adab dan juga akhlak orang berpuasa. Hal ini begitu penting untuk mendapat kesempurnaan ibadah puasa.

Kedua: Persediaan kesihatan. Kesihatan tubuh badan yang sempurna menjamin kesempurnaan ibadah puasa. Kecerdasan seluruh anggota badan diperlukan kerana pada bulan Ramadhanlah tubuh badan dikerah bekerja kuat melaksanakan segala amalan seperti solat sunat tarawih, *qiamullail*, membaca al-Quran, iktikaf dan sebagainya, disamping menjalankan kerja-kerja, atau tugas-tugas seharian tanpa makan dan minum.

Ketiga: Persediaan dari sudut keupayaan ekonomi agar boleh dan mampu bersedekah atau menderma kepada orang, atau golongan yang berhak seperti anak-anak yatim dan fakir miskin. Rasulullah *sallallahu alaihi wasallam* merupakan seorang yang paling suka bersedekah dan dermawan, dan Baginda melebihkan dermanya di dalam bulan Ramadhan. Hal ini diceritakan oleh Ibnu Abbas

*radhiallahu anhum*a seperti yang diriwayatkan oleh Imam al-Bukhari *rahimahullah* yang bermaksud:

“Rasulullah sallallahu alaihi wasallam ialah orang yang paling dermawan. Dan beliau lebih dermawan lagi di bulan Ramadhan di saat beliau bertemu Jibril. Jibril menemuinya setiap malam untuk mengajarkan al-Qur’an. Dan kedermawanan Rasulullah sallallahu alaihi wasallam melebihi angin yang berhembus.”

Keempat: Memperbanyak menyebut hal berkaitan kelebihan dan kemuliaan Ramadhan. Kita dituntut memperbanyak bercerita tentang kemuliaan bulan Ramadhan. Perkara ini bertujuan memberi rangsangan dan semangat kepada kita dan orang di sekeliling kita, bagi membuat persediaan bertemu Ramadhan. Bukankah sesuatu acara itu akan menjadi lebih meriah dan suasananya dapat dirasakan jika kelebihannya senantiasa diwar-warkan. Apatah lagi bulan yang begitu mulia ini sepatutnya lebih layak disebut-sebut kemuliaan dan ganjarannya oleh media massa, media elektronik, media sosial dan seluruh masyarakat dan komuniti umat Islam.

Kaum Muslimin Yang Dirahmati Allah,

Kita adalah makhluk ciptaan Allah yang tidak dapat lari daripada melakukan kesalahan, sama ada dosa besar atau kecil. Sebagai Pencipta, Allah *subhanahu wata’ala* Maha mengetahui cara dan kaedah yang sesuai untuk membaiki, membaik pulih dan mempertingkatkan iman dan akhlak manusia. Selari dengan kelemahan makhluk-Nya itu, maka Allah menawarkan kepada umat Islam bulan Ramadhan dengan keampunan dan pahala yang

berganda serta mengembalikan fitrah akhlak manusia. Rasulullah *sallallahu alaihi wasallam* bersabda :

((مَنْ صَامَ رَمَضَانَ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ))

Maksudnya: “Sesiapa yang berpuasa Ramadhan dengan penuh keimanan dan mengharapkan ganjaran pahala nescaya diampunkan baginya segala dosa yang terdahulu.

(Hadis riwayat Imam al-Bukhari)

Oleh itu, menjelang Ramadhan ini, kita patut memberi tumpuan kepada tawaran daripada Allah *subhanahu wata'ala*, dan bukannya tawaran promosi bermacam-macam produk dan barangan-barangan tertentu yang dikaitkan dengan Ramadhan. Ibadah puasa yang dilakukan dengan sempurna mampu mengawal segala kemaksiatan dunia dan dapat mendidik jiwa menjadi lebih tenang serta membentuk diri menjadi seorang hamba yang bertakwa kepada Allah *subhanahu wata'ala*.

Ketika berpuasa kita bukan sahaja menahan diri dari keinginan makan dan minum, malah segala keinginan dan kehendak nafsu seluruh anggota badan kita, seperti mulut, mata, hati, dan kemaluan kita juga hendaklah turut berpuasa. Kita juga dituntut memperbanyakkan amal ibadah, dan bertaubat di atas dosa-dosa yang pernah dilakukan, dengan mengisi ruang dan masa yang ada bagi meningkatkan keimanan kepada Allah *subhanahu wata'ala* sebagai usaha untuk mendapatkan keredhaanNya. Firman Allah *subhanahu wata'ala* di dalam surah an-Nur, ayat 31 yang bermaksud :

..وَتُوبُوا إِلَى اللَّهِ جَمِيعًا أَيُّهَ الْمُؤْمِنُونَ لَعَلَّكُمْ تُفْلِحُونَ ﴿٣١﴾

Maksudnya : *Dan bertaubatlah kamu sekalian kepada Allah, wahai orang yang beriman, supaya kamu berjaya.*

Kaum Muslimin Yang Dirahmati Allah,

Mengakhiri khutbah, mimbar menyeru marilah kita sama-sama membuat persediaan dengan sebaiknya untuk bertemu dengan Ramadhan pada kali ini. Ambillah kesempatan dengan apa yang telah dijanjikan oleh Allah *subhanahu wata'ala* untuk kita sepanjang bulan Ramadhan. Marilah kita berikhtiar dan berazam untuk menjana kekuatan jati diri kita untuk beribadat kepada-Nya. Bulan impian ini merupakan anugerah Allah *subhanahu wata'ala* kepada hamba-Nya yang hanya datang setahun sekali. Penuhilah ruang dan masa dengan melakukan perkara-perkara yang membawa kebaikan, kerana mungkin bagi tahun yang mendatang kita tidak merasainya lagi.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ. وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ. قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ. وَارْضَ اللَّهُمَّ عَنِ الْخُلَفَاءِ الرَّاشِدِينَ الْمَهْدِيِّينَ، سَادَاتِنَا أَبِي بَكْرٍ وَعُمَرَ وَعُثْمَانَ وَعَلِيٍّ، وَعَنِ الصَّحَابَةِ وَالتَّابِعِينَ هُمْ بِإِحْسَانٍ إِلَى يَوْمِ الدِّينِ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah! Ampunkanlah dosa dan kesalahan kaum muslimin dan muslimat, mukminin dan mukminat, sama ada yang masih hidup ataupun yang telah meninggal dunia. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia ini, lebih-lebih lagi di akhirat kelak.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Islam Negara kami, khususnya kepada *Seri Paduka Baginda Yang di-Pertuan Agong Malaysia*, dan juga pemimpin-pemimpin Islam negeri kami, khususnya *Tuan Yang Terutama Yang di-Pertua Negeri Sarawak*.

Ya Allah, kami memohon ke hadratMu, kukuhkanlah iman kami, tingkatkanlah amal kami, eratkanlah perpaduan kami, murahkanlah rezeki kami, kayakanlah kami dengan ilmu pengetahuan, kemahiran dan keterampilan yang bermanfaat. Suburkanlah peribadi kami dengan budi pekerti yang mulia, bimbinglah kami ke jalan yang Engkau redhai, lindungilah kami daripada ujianmu seperti banjir besar, kemarau panjang, wabak penyakit, persengketaan, kemiskinan dan kebuluran. Kami berlindung dan bermohon denganMu Ya Allah, semoga negeri kami akan sentiasa bertambah aman, makmur dan berkat.

Pada hari yang mulia ini juga, kami memohon kepadaMu ya Allah, jadikanlah setiap individu generasi muda di kalangan remaja dan belia generasi pelapis negara dan negeri kami ini golongan yang beramanah, bertanggungjawab, dan berakhlak mulia agar dapat membentuk sebuah masyarakat yang baik, aman dan bertamadun, serta mendapat keampunan, keredhaan dan berkat daripadaMu, ya Allah. Peliharalah kami serta generasi yang mewarisi kami, daripada terlibat dalam apa jua unsur negatif yang boleh menjatuhkan maruah diri, keluarga, masyarakat dan negara.

رَبَّنَا أْتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أُمِينَ أُمِينَ يَا رَبَّ
الْعَالَمِينَ. عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ. يَعِظُكُم لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ يَذْكُرْكُمْ.
وَاشْكُرُوا عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا
تَصْنَعُونَ. أَقِيمُوا الصَّلَاةَ.